

SAMOA

Faatulagaina o Aiaiga

1. Igoa puupuu ma le amataga
2. Ua faaofiina le Vaega Fou
3. Soloaiga

2013, Nu. 19**O SE TULAFONO e teuteu ai le Tulafono o Lafoga o Tupe Maua 2012 (“Tulafono autu”). [9 Aokuso 2013]****UA FAIA** e le Fono Aoao Faitulafono a Samoa i totonu o le Palemene ua potopoto e faapea:

1. Igoa puupuu ma le amataga-(1) E mafai ona taua lenei Tulafono o le Tulafono o Teuteuga o le Tulafono o Lafoga o Tupe Maua 2013.

(2) O lenei Tulafono ua faatatauina e faapea na amata faamamaluina mai le aso 1 o Iulai 2013, ma ua faapea ona aloaia le faamamaluina, mai lea taimi ua tuanai.

2. Ua faaofiina le Vaega Fou - Mo le Tulafono autu, i le tuanai ai o le fuaiupu 104, ia faaofi e faapea:

“Vaega 5

Fuafuaga o Tupe Totogi Atu o Lafoga

“104A. Tupe teufaafaigaluega tau fale talimalo-(1) I le noatia ma le fai fuafua i le fuaiupu 60(d), o se tagata o ia lea o lo o teufaafaigaluega ana tupe, a itiiti mai e \$100,000 i se atinae faamaonia tau tagata tafafao maimoa, ua faatagaina tupe totogi o lafoga faasaga i lafoga o tupe maua e totogi mo tupe e maua e le tagata, i le fua faatatau e 100% o tupe teufaafaigaluega (“o tupe totogi o lafoga”).

(2) E noatia le faatagaina o tupe totogi o lafoga i luga o tuutuuga nei:

- (a) o le atinae faamaonia o tagata tafafao maimoa, o se atinae o tagata tafafao maimoa lea e tuuina atu apitaga faatulagaina i le vasega muamua aupito sili ona lelei tau faale talimalo i totonu o Samoa, e pei ona faamaonia e le Kapeneta, e faia i luga o le fautuaga a le Minisita o Tupe; ma
- (b) o tupe totogi o lafoga po o le paleni o ia tupe totogi o lafoga, e toe faafoi e faasaga i se lafoga o tupe maua e totogiina i le tausaga, po o tausaga ua faamaonia e le Komesina seia oo ina ua leai ni tupe totoe o lafoga; ma
- (c) o lo o taofia tupe teufaafaigaluega mo se vaitaimi a itiiti mai e lima (5) tausaga i se faatulagaga o tupe teufaafaigaluega ua faamaonia i se faiga tusitusia e le Minisita o Tupe.

(3) Afai e le o taofia tupe teufaafaigaluega i lalo o le faafuaiupu (2)(c), e ao i le Komesina ona:

- (a) faalēaogāina tupe totogi o lafoga; ma
- (b) iloilo pe toe fuafuaina noataga tau lafoga o tupe maua a le tagata e tusa ai ma lenei Tulafono,

ma e noatia le tagata o lo o aafia mo lafoga o tupe maua e faapei ai e le i faatagaina tupe totogi o lafoga i lalo o le faafuaiupu (1).

(4) E mafai ona faia Tulafono Faatonutonu i lalo o le fuaiupu 106 e faamamaluina ai le, po o mo faamoemoega o lenei fuaiupu.

(5) O lenei fuaiupu e muta le aogā i le aso 30 o Iuni 2018, e aunoa ma le aafia ai o le tulaga aloaia o so o se mea ua faia po o ua tuuina atu i lalo o lenei fuaiupu po o so o se aia tatau, aia po o se igoa ua maea ona mauaina, faatupulaia, po o ua faavaeina, po o so o se faiga e foia ai, po o taualumaga mo so o se tupe totoi o lafoga ua faatagaina i lalo o lenei fuaiupu.”.

3. Soloaiga - O so o se tupe teufaafaigaluega na faia po o tupe na totoi atu o lafoga ua faatagaina i lalo o le fuaiupu 31 o le Tulafono o Lafoga o Tupe Maua 1974 ua soloia, e faaauau pea e faapei ai na faia i lalo o le fuaiupu 104A o le Tulafono autu.

**O le Tulafono o Teuteuga o le Tulafono o Lafoga o Tupe
Maua 2013 o lo o faafoeina e le Matagaluega mo Tupe Maua.**

**Lolomiina e le Failautusi o le Fono Aoa o Faitulafono,
i le pule a le Fono Aoa o Faitulafono.**